

**Tun Abdullah Minta Dunia Islam Bersatu Dan Hidup Dengan Aman
Bernama
4 Oktober, 2011**

KUALA LUMPUR, 4 Okt (Bernama) -- Bekas perdana menteri Tun Abdullah Ahmad Badawi berkata masyarakat Islam di seluruh dunia perlu bersatu padu bagi memastikan Dunia Islam tinggal bersama secara aman dan harmoni.

Katanya banyak tempat dalam Dunia Islam tidak aman kerana mereka menghadapi masalah yang berlarutan sekian lama dan tidak dapat diselesaikan seperti di Timur Tengah.

"Kita ada Islam, ada Al-Quran, kita solat lima kali sehari dan hanya satu Tuhan, Allah dan tanpa mengira keadaan hidup kita, kita masih ada masalah di kalangan kita sendiri.... tak boleh bekerjasama dan bersatupadu.

"Di Timur Tengah... saya tidak perlu mengulangi perkara ini, seperti anda tahu, keadaan yang tidak akan menggembirakan anda, rasa kecewa dan marah dengan masalah yang dihadapi dan masalah yang tidak dapat diselesaikan," katanya pada uaputama pada Forum "Keamanan dan Keselamatan - Dari Perspektif Islam" di sini Selasa.

Forum tersebut dianjurkan oleh Institusi Diplomasi dan Hubungan Luar Negara Malaysia (IFDR) dan Institut Antarabangsa Pengajian Islam Lanjutan (IAIS).

Abdullah menjelaskan bagi menikmati keamanan dan keselamatan, proses tersebut perlu melibatkan masyarakat Islam dan bukan Islam di seluruh dunia untuk mencari jalan tengah supaya semua rakyat boleh bekerjasama bagi mencapai matlamat itu.

"Kita sedang membicarakan isu keamanan dan keselamatan untuk sekian lama dan kita cuba memperkenalkan Islam Hadhari... inilah platform bersama di mana kita dapat bekerjasama dan mencapai keamanan," katanya.

Mengenai isu Palestin, yang cuba memperoleh keanggotaan penuh dalam Pertubuhan Bangsa-Bangsa Bersatu (PBB), Abdullah, yang juga penaung IAIS, berkata perlu wujud perpaduan antara Hamas dan Fatah.

"Kita perlu memastikan wujud perpaduan antara Hamas dan Fatah, sekiranya mereka tidak bersatu maka sukar untuk pihak lain membantu.

"Isu Palestin bukan sahaja penting untuk Timur Tengah tetapi juga penting kepada kita...sekiranya isu itu boleh menjejaskan Timur Tengah maka ia juga memberi kesan kepada kita," katanya.

---BERNAMA

Hakcipta © 2011 BERNAMA

Source: <http://www.bernama.com/bernama/v5/bm/newsindex.php?id=617712>